

Wolayta - Wotaaddarati Xoossaa - Soldiers Scriptures

Efisoona 6:10-18

- 10 Wursettan, Godaaninne a gita wolqqan minnite.**
- 11 Xalahee halaqaa iita cimuwaa teqqanau intte danddayana mala, Xoossai intteyyo immiyo ollaa maayo ubbaa maayite.**
- 12 Aissi giikko, nuuni saluwaa sohuwan de7iya iita ayyaana wolqqatuura, haariyaageetuura, godatettai de7iyaageetuaranne ha xuma biittaa haariyaageetuura olettiyoogaappe attin, asaara baaxetokko.**
- 13 Hegaa gishshau, iita gallassan teqqanaunne qassi wurssetta gakkanaassi wareettoogaappe guyyian, minni eqqanau intte danddayana mala, Xoossaa ola miishsha ubbaa oiqqite.**
- 14/15 Hegaa gishshau, xeessan qabattuwaa gixxiyoogaadan tumatettaa gixxidi, tiran wottiyo ola miishshadan xillotettaa maayidi, intte tohuwan caammaa wottiyoogaadan sarotettaa wonggeliyaa mishiraachchuwaayootanau giigidi, minni eqqite.**
- 16 He ubbaappe aattidi, xalahe halaqai dafidi yeddiyo wonddafiyaa tama ubbaa toissanau, ammanuwaa ubba wode gonddalledan oiqqite.**
- 17 Ammanuwaa huuphiyan wottiyo birata qophedan wottite; qassi Geeshsha Ayyaanaa bisuwaa, Xoossaa qaalaa, oiqqite.**
- 18 Xoossaa woossiiddinne a maaduwaa oichchiiddi, ubba wode Geeshsha Ayyaanan Xoossaa woossite. Hegaa gishshau, minnite; salettoppite; geeshshatu ubbaayyo Xoossaa ubba wode woossite.**

Mazamure 91:1-16

- 1 Ubbaappe Xoqqiya Xoossan naagettidi de7iyaanne Ubbaappe Wolqqaama Xoossaa kuwaa giddon aqiya asi GODAASSI yaagana, "Neeni taayyo qatonne baqata attiyo soho; neeni taani ammanettiyo ta Xoossaa" yaagana. 3I nena shankkanchchatu gitinyaappekkka wori wurssya harggiyaappekkka ashshana. 4I ba baalletun nena kammana; a qefetu garssi neeni baqatada qosetta attana. I ammanettiyaagaa; a tumatettai neeyyo gonddalle. 5 Neeni qammi daganttiyaabau, woikko gallassi xonggettiya zubbiyau, woikko xuman oiqqiya harggiyau, woikko gallassa seetan wurssya boshau yayyakka. 7 SHa7ai ne miyyessaara, qassi tammu sha7ai neeppe ushachcha baggaara kunddana; shin nena aibinne bochchenna. 8 Neeni ne aifiyan xeello xeellananne iitati**

qaxxayettiyoogaa be7ana. 9GODAA neeni neeyyo baqata attiyo soho oottido gishshaunne, Ubbaappe Xoqqiya Xoossaa neeyyo de7iyo soho oottido gishshau, 10iitabai nena bochchenna; boshaiika ne keetaa shiiqenna. 11Aissi giikko, ne ogiyan ubban nena naagana mala, Xoossai ba kiitanchchata azazana. 12Ne tohoi shuchchan xubettenna mala, kiitanchchati bantta kushiyen nena denttana. 13Neeni gaammuwaanne shooshshaa bollan heemettana; qassi yashhiya gaammuwaanne woriya shooshshaa neeni yedhdhana.

- 14 Xoossai hagaadan yaagees; "I tana siiqido gishshau, taani a ashshana. I ta sunttaa erido gishshau, taani a naagana.**
- 15 I tana xeegiyo wode, taani ayyo koyana. Metuwan taani aara issippe gidana; taani a ashshananne bonchchana.**
- 16 Taani a bariyaa adussada kalssana; ta atotettaa a bessana" yaagees.**

Mazamure 18:1-50

- 1 Abeet GODAU, ta wolqqau, taani nena siiqais.**
- 2 GODAI tau wogga zaallaa; taani olaappe naagettiyo miixaa; i tana ashshiyaagaa. Ta Xoossai taani akko baqatiyo ta wogga zaallaa. I ta gonddalliyyaa. I tana ashshiya wolqqaamaa; i taani qosetta attiyo soho.**
- 3 Galatai bessiyo GODAA taani xeesais; i ta morkketuppe tana ashshees.**
- 4 Haiquwaa hirggai wodorodan tana phupphuriis; bashhai di7odan tana muukkiis.**
- 5 Duufuwaa wodoroi tana qachchana hanees; haiqoi piredan tana oiqliis.**
- 6 Tana metoi iissin, GODAA xeesaas; "Tana maadda" gaada ta Xoossaayyo waassaas. I ba Beeta Maqidasiyan ta cenggurssaa siyiis; taani waassido waasoi a haittan wodhdhiis.**
- 7 Wodhdhin Xoossai hanqqettido gishshau, biittai yaaqiyaqidi qaaxxiis; deretu xaphoi gajigajidi kokkoriis.**
- 8 A siiriyaappe hanqqwaa cuwai cuwattiis; a doonaappe miya tamaa lacoinne xuuggiya bonqdoi kiyiis.**
- 9 Saluwaa i phalqqidi, duge wodhdhiis; he wode a gediyaappe garssaara sikkida shaarai de7ees.**
- 10 Qefiyaara de7iya kiitanchchaa kiuubiyan uttidi paalliis; carkkuwaa qefiyaa ekkidi eesotiis.**
- 11 Bana xuman kammiis; a dunkkaanee iraara sikkida shaaraa.**
- 12 A sinttan de7iya gita poo7uwaappe shachchainne tamaa lacoi kiyiis; kiyidi sikkida shaaraa kanttidi biis.**
- 13 Qassi GODAI dadaadan saluwaappe guummiis; Ubbaappe Xoqqiya**

Xoossai ba cenggurssaa sissiis.

**14 Ba wonddafiyaa zubbiyaa yeddidi, ba morkketa laaliis; wolqqanttaa
poo7uwaa kiittidi, eta yedettiis.**

**15 Abeet GODAU, neeni seerido wodenne, hanqgettada peenuqido wode,
abbaa haattai zin77ido biittai beettiis. Qassi sa7aa baasoikka qonciis.**

**16 GODAI bollappe kushiyaa duge yeddidi, tana oiqqiis; ciimma haattaappe
tana kessiis.**

**17 I tana ta wolqqaama morkkiyaappenne tana ixxiyaageetuppe ashshiis.
Aissi giikko, eti taayyo keehi daro wolqqaama.**

**18 Ta waayiyaa gallassi eti ta bolli denddidosona; shin GODAI tana
zemppissiyaagaa.**

19 I tana aaho sohuwaa kessiis; tanan ufaittido gishshau, tana ashshiis.

**20 Ta xillotettaadan GODAI tau qanxxiis; ta kushiyaa geeshshatettaadan i
tau zaariis.**

21 Taani GODAA ogiyyaa kaallaas; taani ta Xoossaa aggada wora babeikke.

22 Taani a higgiyaa ubbaa naagaas; a wogaa poliyoogaa aggabeikke.

23 Taani a sinttan suure de7aas; taani tana nagarappe naagaas.

**24 Hegaa gishshau, GODAI tau ta xillotettaadaaninne ta kushee a sinttan
geeshsha gidiyoogaadan zaariis.**

**25 Abeet GODAU, ammanettiyaageetuyyo neeni ammanettiyaagaa;
suuretuyyo neenikka suure.**

26 Geeshshatuyyo neenikka geeshsha; shin geellatuyyo neeni cincca.

**27 Banttana ziqqissiyaageeta ashshaasa; shin banttana xoqqissiyaageeta
neeni ziqqissaasa.**

**28 Abeet GODAU, neeni ta xomppiyaa poo7issaasa; ta Xoossai poo7issin,
ta xumai kichchees.**

**29 Ne maaduwan taani ta morkke wottaaddaratu bolli woraajjais; ta
Xoossan taani eta miixaa xeeraara guppa aadhdhais.**

**30 Xoossaa ogee suure. GODAA qaalai ammanettiyaagaa. Akko baqatiya
ubbatussi i gonddalle.**

**31 GODAAPPE attin, hara xoossi baawa; nu Xoossaappe attin, hara wogga
zaalli baawa.**

**32 Taayyo wolqqa immiyaageenne ta ogiyyaa saro oottiyaagee
Xoossaattennee.**

**33 I ta gediyyaa genessaa gediyaadan minttees; tana xoqqa sohotun
sarotettan wottees.**

**34 I ta kushiyaa olaa meezyees; hegaa gishshau, taani ta qesiyan
nahaasiyaa giyo birataa wonddafiyaa dafada dukkais.**

- 35 Tana ashshiya ne gonddalliyyaa neeni taayyo immadasa. Ne ushachcha kushee tana zemppissees; ne lo77o ohettai tana gitayees.**
- 36 Ta hemettiyoosaa aassaasa; hegaa gishshau, ta tohoi harchchibeenna.**
- 37 Ta morkketa taani yedetta oiqqaas; taani eta xaisennan de7aidda guyye simmabeikke.**
- 38 Taani eta naa77antto dendennaadan shocaas; eti ta tohuwan wullidosona.**
- 39 Olau tana wolqqa gixissadasa; tanaara gaaddetiyaageeta taayyo gulbbatissadasa.**
- 40 Ta morkketa ta sinttappe guyye baqatissadasa; tana ixxiyaageeta taani xaissaas.**
- 41 Bantana maaddana mala waassidosona, shin ooninne eta ashshibeenna. GODAAKKA eti xeesidosona, shin i etau koyibeenna.**
- 42 Carkkoi pittidi efiyo baanadan taani eta liiqissaas; ogyan de7iya urqqaadankka eta yedhdhaas.**
- 43 Makkala asappe tana ashshadasa. Tana kawotettatu bollan sunttadasa; taani erenna asai tau haarettiis.**
- 44 Eti ta woriyaa siyidi, tau azazettoosona; allaga deree asaikka ta sinttan lahottees.**
- 45 Eti wozanaa kahaa bayoosona. Bantta naagettiyo miixaappe kokkorioddi yoosona.**
- 46 GODAI de7ees! Xoossai, ta wogga zaallai galatetto! Tana ashshiya Xoossai xoqqu xoqqu go!**
- 47 I ta haluwaa kessiya Xoossa; kawotettata taappe garssaara haarissiyaagaa;**
- 48 ta morkketuppe tana ashshiyaagaa. Abeet GODAU, neeni tanaara gaaddetiyaageetu bollan tana xoqqu xoqqu oottaasa; makkalanchcha asatuppe neeni tana ashshaasa.**
- 49 Hegaa gishshau, taani nena kawotettatu giddon galatana; taani ne sunttaa sabbana.**
- 50 Xoossai ba kawuwaassi xoonuwaa bollan xoonuwaa immees. Ba tiyidoogaassi, Daawitassinne a zerettaassi, aggenna siiquwaa merinau bessees.**